

# PM ucap tahniah Suzanna ikon wanita dunia

BH - 19/9/2021 m/d: 2

**Kuala Lumpur:** Perdana Menteri, Datuk Seri Ismail Sabri Yaakob semalam menzahirkan ucapan tahniah kepada Komander Dr Suzanna Razali Chan yang diiktiraf sebagai ikon wanita dunia dalam bidang mencari dan menyelamatkan (carilamat) oleh Persekutuan Penyelamat Maritim Antarabangsa (IMRF).

Menerusi catatan di Facebook rasminya, Ismail Sabri berkata, pengiktirafan kepada Ketua Penolong Pengarah Bahagian Ca-

rilamat dan Bantuan Bencana, Agensi Penguatkuasaan Maritim Malaysia (Maritim Malaysia) itu menjadi kebanggaan seluruh Keluarga Malaysia.

“Malah menjadi sumber inspirasi dan semangat bagi semua pihak dalam menjaga keselamatan rakyat dan kedaulatan negara,” katanya menambah, Suzanna, 40, adalah wanita pertama dari rantau Asia Tenggara yang dipilih menerima anugerah amat berprestij itu.

Menerusi IMRF Awards 2021, Suzanna dinobatkan sebagai ikon bagi kategori itu berdasarkan komitmennya, kelayakan dan kepakarannya dalam bidang mencari dan menyelamatkan maritim (MSAR), malah beliau juga wanita pertama Asia Tenggara memenangi anugerah terbabit.

Anugerah disampaikan Ketua Pegawai Eksekutif IMRF, Theresa Crossley secara dalam talian pada Majlis Penganugerahan IMRF Awards 2021 yang berlang-

sung dari London, United Kingdom melalui akaun YouTube rasmi IMRF pada 14 September lalu.

Maritim Malaysia sebelum ini memaklumkan, Suzanna pernah membuat pembentangan *Women in SAR* di *World Maritime Rescue Congress* pada 2019 dan dijemput sebagai panel pembentang dalam bidang sama sempena *International Women's Day* pada 8 Mac lalu.

Selain itu, beliau juga adalah



jurulatih dalam bidang Carilamat Maritim sejak 2011 dan pernah menerima sijil kepujian atas pembentangan terbaik sewaktu menyertai kursus di Jepun pada 2018.

BERNAMA